

## বাউফলে নতুন বই পায়নি চতুর্থ ও পঞ্চম শ্রেণির শিক্ষার্থীরা

কৃষ্ণ কর্মকার, বাউফল

পটুয়াখালীর বাউফল উপজেলার ২৩১টি প্রাথমিক বিদ্যালয়ের চতুর্থ ও পঞ্চম শ্রেণির কয়েক হাজার শিক্ষার্থী নতুন বই পায়নি। তারা ৩টি বিষয়ের বই পেয়েছে। গতকাল রোববার উপজেলার কালাইয়া, নাজিরপুর ও নওমালা ইউনিয়নের কয়েকটি বিদ্যালয়ের শিক্ষক এবং শিক্ষার্থীদের সঙ্গে কথা বলে এ তথ্য জানা গেছে। তবে উপজেলার সব প্রাথমিক বিদ্যালয়ের শিশু, প্রথম, দ্বিতীয় ও তৃতীয় শ্রেণির শিক্ষার্থীদের মধ্যে বছরের প্রথম দিনই বিনামূল্যের নতুন বই বিতরণ করা হয়েছে। চতুর্থ ও পঞ্চম শ্রেণির কয়েকজন শিক্ষার্থী জানায়, ওরা (শিশু, প্রথম, দ্বিতীয় ও তৃতীয়) সব বই পেয়েছে। ওদের মনে খুব আনন্দ। আমরাও বছরের প্রথম দিনই সব বই পেলে ওদের মতো আনন্দ পেতাম।

উপজেলা শিক্ষা কর্মকর্তার কার্যালয় সূত্রে জানা গেছে, এ বছর চতুর্থ শ্রেণির জন্য আট হাজার ৪৯৪ সেট ও পঞ্চম শ্রেণির জন্য আট হাজার ২৪২ সেট বইয়ের চাহিদা দেওয়া হয়েছিল। এর মধ্যে চতুর্থ ও পঞ্চম শ্রেণির সব সেটের বাংলা, ইংরেজি ও গণিত বিষয়ের নতুন বই পৌঁছানো হলেও বাংলাদেশ ও বিশ্ব পরিচয়, প্রাথমিক বিজ্ঞান এবং ইসলাম ও নৈতিক শিক্ষা এ তিন বিষয়ের নতুন কোনো বই তাদের কাছে পৌঁছায়নি। এ কারণে শিক্ষার্থীদের হাতে ওই তিন বিষয়ের বই এখনো পৌঁছানো সম্ভব হয়নি।

উপজেলা শিক্ষা কর্মকর্তা রসলাল রায় সত্যতা নিশ্চিত করে বলেন, নতুন বই পাওয়ার সঙ্গে সঙ্গেই চতুর্থ ও পঞ্চম শ্রেণির সব শিক্ষার্থীর মধ্যে বাকি তিন বিষয়ের নতুন বই বিতরণ করা হবে। উপজেলা প্রাথমিক শিক্ষা কর্মকর্তা মো: আতাউর রহমান বলেন, খুব কম সময়ের মধ্যে যাকে শিক্ষার্থীদের হাতে বিনামূল্যের নতুন বই পৌঁছানো যায়, সে প্রচেষ্টাই চলেছে।